



**TERTIB ACARA KEBAKTIAN MINGGU
GKPS P.BULAN-RESORT POLONIA MEDAN
Minggu SEPTUAGESIMA, 31 Januari 2021**



TOPIK: "HATA NI JESUS NA GOK KUASA"

Live streaming: www.gkpspadangbulan.com/tv

Tata Ibadah: <http://www.gkpspadangbulan.com/tatib>

1. Votum – Introitus – Tonggo

P: Riap ma hita jongjong!

K: Ibagas goran ni Naibata Bapa, pakon Tuhan Jesu Kristus ampa Tonduy Napansing, Sitompa langit pakon tanoh on. Amen.

Roh ma nasiam hu Bangku, nasiam na loja anjaha na boratan, ase Hupasonang nasiam. Jalo nasiam ma pasangan-Ku anjaha marguru ma nasiam hun Bangku, ai lamlam do Ahu anjaha na toruh maruhur, ase dapotan hasonangan tonduy nasiam (Mateus 11:28-29). Haleluya, haleluya, haleluya!

K: (*Mandodingkon*) Haleluya, Haleluya, Haleluya!

P: Martonggo ma hita!

Ham Tuhan Naibata paridop ni uhur na tarsulur. Puji-pujian ampa hasangapon ma isombahkon hanami hu Bamu, halani ipasompat Ham ope hanami boi roh hu lobei-Mu marhasadaon panorang on. Domma pala manaron Ham halani dousa pakon hajahatonnami. Mangelek ma hanami, sorapkon Ham ma Tonduy-Mu hu bannami, ase margogoh hanami pataridahkon idop ni uhur-Mu pakon pasaudkon harusuh ni uhur-Mu. Jalo Ham ma hanami marhitei Anak-Mu Jesus Kristus Tuhan sihopkop hanami. Amen. (*hundul kuria*).

2. Mandoding 402. Puji ma Naibatanta (1-2)

1. Puji ma Naibatanta bai ianan Na PansingNi in, Bai paratas hamuliaonNi in Haleluya, Haleluya Puji ma Naibata.

Pasangap ma goranNi halani pambahenanNi in, ampakon hagogohonNi in Haleluya, Haleluya pasangap Naibata

Pahata ma tarompit ge arbab pe, irandu pakon gondrang husapi pe Irik homa sarunei ge sordam pe, sonai ampakon ogung marolol bei

Puji ma rumbuk ma baen parhata ni parugas in
Sombah ma marhiteihonni doding na lurlur ijin

2. Puji ma Naibatanta Sipargogoh na tarsulur in, Parsimada harajaon in Haleluya, Haleluya Puji ma Naibata
Pasangap ma goranNi, ale ganup na marhosah in, Ningon rup ma mamuji ijin Haleluya, Haleluya Pasangap Naibata
Pahata ma tarompit ge arbab pe, irandu pakon gondrang husapi pe Irik homa sarunei ge sordam pe, sonai ampakon ogung marolol bei
Puji ma rumbuk ma baen parhata ni parugas in
Sombah ma marhiteihonni doding na lurlur ijin

3. Hasasapan ni Dousa

P : Riap ma hita jongjong, sompotkon hita dousanta hubani Tuhan Naibatanta!

Ham Tuhan Naibata Bapanami, Pardear layak anjaha Parholong ni uhur hubani haganup Jolma. Domma ihatahon Ham ase totap ma hanami marhasadaon, manggoluh ibagas damei ampa marsihaholongan. Hape gati do hanami margoluh ampa marpambahenan na so iharosuhkon Ham. Hurang sirsir hanami paingathon hasoman. Gati pambahenannami, parsahapnami mambobai hasoman hubani na hurang dear. Gati hanami mamakei hasoman padaskon sura-sura ni uhur tumang. Ambah ni ai gati lupa hanami mandalankon tanggungjawabnami i tongah-tongah ni keluarga ampa rumahtangganami bei. Halani in ma ase roh hanami ibagas unduk pakon toruh ni uhur hulobei-Mu mansopotkon dousanami. Maidop ma uhu-Mu bennami, sasap Ham ma dousa nami in. tompa ham ma uhur na baru bennami, ase ulang i nunut hanami mardosa dampak Ham age dampak hanami jolma. Ipindo hanami on hu Bamu, ibagas Goran ni AnakMu, Jesus Kristus Tuhannami. Amen.

P : Tangar hita ma bagah-bagah pasal hasasapan ni dousa:" Anggo isopotkon hita dousanta, hatengeran ni uhur anjaha bonar do la manasap dousanta, ampa paborsih hita humbani haganup hagedukon (1 Joh.1:9). Hasangapon ma bani Naibata ibabou!

P/K : Amen!

(*hundul kuria*)

4. **Mandoding 475. Ham Naibatanku (1-3)**

1. Ham Naibatanku i surga paratas-Mu
manrogop au nuan ilobei-Mu.
Tunggung tumang sangap do goran-Mu,
'ge kuasa-Mu totap do in toguh.
2. Roh au manowod martonggo hu lobei -Mu,
unduk do au mangindo holong-Mu.
Sai sasap Ham dousangku haganup,
useihon Ham ma hu bangku layak-Mu.
3. Ham do hupuji tongtong bani tonggongku,
marhiteihon goran ni Anak-Mu.
Na dob jonam, pansing janah pintor,
Jesus Tuhanku sigomgom hajojor

5. **Hata Haporsayaon**

P. Riap ma hita jongjong!

Saksihon hita ma haporsayaonta in, songon na sinaksihon ni haganup halak na porsaya bani sab tanoh on!

P+J. Ahu porsaya bani Naibata Bapa, Pargogoh na so tarimbang, na manompa langit pakon tanoh on. Ahu porsaya bani Jesus Kristus, Anak ni Naibata na sasada in, in do Tuhanta, na tinubuhkon ni si Maria sanggah nape haliaban, marhitei tonduy na pansing. Na manaron na parngit, bani panorang ni si Pontius Latus, iparsilangkon, matei anjaha itanom, turun hu nagori toruh. Mulak manggoluh humbani na matei bani ari patoluhon. Naik hu surga anjaha hundul i siamun ni Naibata Bapa, Pargogoh na so tarimbang in. Hunjai ma la mulak magira laho manguhumi halak na manggoluh pakon na dob matei. Ahu porsaya bani tonduy na pansing, bani kuria parsadaan na mapansing in, parsaoan ni sagala na mapansing in, bani hasasapan ni dousa, bani parpuhooon ni angkula, pakon bani hagoluhan na sadokah ni dokahni. Amen! (*hundul kuria*)

6. **Tingting + Tonggo Pangapition**

7. **Mandoding 337. Husombah Ham Tuhan (1-3)**

1. Husombah Ham Tuhan tangihon au!
Sai uhur-Mu Tuhan pasaud Ham
Sai lambin tambah ma holongku hu Bamu
Sai tambah ma holong Bamu
2. Sanggah na kahou au, daoh hun Bamu.
Sai ipindahi Ham, jumpah Ham au.
Halani in holong do, uhurhon Bamu.
Sai tambahma holong Bamu.
3. Sanggah tarsosak au, parngit tumang,
lapoh Ham do a, sonang tumang .
Haposankin do Ham, Ham Sipagoluh au.
Sai tambah ma holong Bamu

8. **Ambilan: Lukas 4:31-37**

9. **Manggalang:**

P. Paima iondoskon hita galanganta, jaloonta ma hata ni Naibata na gabe onjolan banta laho manggalang na tarsurat bani Psalmen 50:14, "Galangkon ma bangga ni uhur bani Naibata, anjaha galari ma bagah- bagah mu bani Sitimbulan in". Sonari ondoskon hita ma galanganta!**Sonari patumpu hita ma galanganta.**

490. **Sonang Rapkon Jesus in**

1. Sonang rapkon Jesus in, rapkon Jesus tongtong, rapkon Jesus tongtong, la Panondang bai na golap in, Rap Jesus daoh biar ijin.
Baritahon Jesus in, pakon hasintonganNin,
janah ulang mabiar ham ijin.
2. Sai ambilankon ma in, ambilankon ma in, ambilankon ma in.
Hasintongan-Ni sahapkon ma in, rap Jesus daoh biar ijin.
Ambilankon Jesus in pakon ganup Hata-Nin,
janah ulang mabiar ham ijin

10. Tonggo Galangan – Panutup – Pasu-pasu:

P. Riap ma hita jongjong!

Riap ma hita jongjong! Martonggo ma hita mangondoskon galanganta hubani Tuhan Naibatanta:

Ibagas uhur na martarimakasih roh do hanami marsombah hu-Bamu Tuhan, irik padaskon galangan bangga ni uhur nami hu-Bamu. Idop ma uhur-Mu Tuhan, jalo Ham ma hanami riap ampakon galangan nami on. Sai lambin pasu-pasu Ham ma homa goluh nami, sonai age gogoh nami laho mangirikkon Ham. Pinuji ma Goran-Mu! Pasu-pasu Ham ma Kuria-Mu ija bei pe marianan, sonai age bangsa pakon nagara nami, bani buei tantangan ampa hamaholon na idompakkon hanami. Urupi janah-pasu-pasu Ham ma hanami ale Tuhan. Jalo Ham ma tonggo pangindoan nami on na ipadas hanami ibagas Tuhan Jesus Kristus Sipaluah hanami. Amen.

P/K : *(Mandodingkon Halleluya No. 5:4)*

Bamu sadokah ni dokahni, au on o Jesus Tuhankin,
Ham ma lah haganup ompungni, gogohku pakon artangkin,
Ai iberehon Ham darohMu, manggalar utang ni dousangku.

P : Ham Tuhan Naibata, Bapanami pargogoh na so tarimbang harohan ni pasu-pasu. Puji-pujian pakon tarima kasih ma isombahkon hanami hu Bamu, halani ipatalar Ham do holong-Mu na bangga in marhitei Jesus Kristus Anak-Mu in. Tonduy Napansing ma paliharhon uhurnami, ase torang ididah hanami sinondang na hum-Bamu. Hasomani janah parhogohi Ham ma hsnami haganup pagori ni kuria-Mu, ase ibagas haringgason pakon malas ni uhur mangkagoluhkon janah mangambilankon hata-Mu. Maidop ma uhur-Mu, balosi Ham ma tonggonami, marhitei Anak-Mu Jesus Kristus, Tuhannami. Amen

P : Ham Bapanami na i nagori atas. Sai napapansing ma goran-Mu! Sai roh ma harajaon-Mu. Sai saud ma harosuh ni uhur-Mu i nagori tongah on songon na i nagori atas! Bere Ham ma bannami sadari on hagoluhan ari-ari. Sasap Ham ma dousanami songon panasap nami bani dousa ni hasoman na mardousa dampak hanami! Ulang hanami bobai Ham hu parlajouan! Paluah Ham ma hanami hun bani pangagou!

P/K : *(Mandodingkon)*

Ai Ham do simada harajaon, pakon hagogohon ampa hasangapon sadokah ni dokahni. Amen.

P : Laho ma nasiam, janah “Ulang ma surut ringgas ni uhur nasiam, hinsah ma ibagas Tonduy, sirsir ma mambalosi Tuhan in”

P : Jalo nasiam ma pasu-pasu humbani Tuhan Naibatanta: “Ipasu-pasu anjaha iparorot Tuhan Naibata ma hita (ham), isondangkon Tuhan Naibata ma bohini hu banta (bamu) janah maidop ma uhurni mangidah hita (ham), idompakkon Tuhan Naibata ma bohi-Ni hu banta (bamu), janah ipasorap ma damei-Ni hu bani tonduy ta(mu). Amen!!

P/K : (Mandodingkon) Amen... Amen... Amen..!